

11. april 2022

UPA2022/43

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inoqarfinnut isorliunerusuniittunut nunaqarfinnullu periarfissat pillugit inuttut ilanngaammut, nuna tamakkerlugu akileraarutip appasinneruneratigut, ilinniarnermilu taarsigassarsiniarnermi taarsersuinnermut iluaqusersuinerit il. il. nunatsinni atulersinnaanerit pillugu Norgemi Finnmarkimut atugassaritinneqartut isumassarsiorfigalugit Naalakkersuisut misissuequllugit peqquneqarnissaannik Inatsisartut aalajangiiffigisassaattut siunnersuut. Misissuinnermi periutsit taamaattut nunatsinni atuutsinneqalersinnaanerannut aningaasaqarnikkut allaffissornikkullu pisortanut, namminersortunut innuttaasunullu aningaasatigut malitsigisassaataq ilaatinneqassapput. Misissuinnerup inernerit kingusinnerpaamik UPA2023-imi inatsisartunut agguanneqariissapput.
(Siumumi Inatsisartunut gruppiat)

Tunngavilersuut:

Ilisimaneqartutut nunatsinni sumiiffiit assigiinngitsut eqqarsaatigalugit, aningaasap nalingata pisissutigineqarsinnaanerit assigiinngillat.

Nunatsinni isorliunerusut avinngarusimasumiittutullu taasartakkagut eqqarsaatigalugit aningaasap pisissutigineqarsinnaanerata nalinganut naapertuuttumik aaqqissuuseqqissalluni piffissanngorpoq. Atorfiit assigiinngitsut isorliunerusuni pisariaqartut inulerinnermi, ass. ilinniartitsisoqarnermi allarpassuarnilu amigaataasut annerusumik amigaatigineqaleriartussanngippata akileraartarnikkut oqilisaassutaasumik aaqqissuussineq isorliunerusuni eqqarsaatigissallugu pisariaqalernikuuvoq. Nioqqutissanik pisiniarnermi akit qaffasissorujussuupput pingaartumik unammillerfiunngitsuni. Aammalu angallannikkut akit qaffasissorujussuuneri pissutaallutik angalaniarsinnaaneq ajornarnerulluni.

Siammasissumik nunaqariuseqarpugut nammaqatigiinnermillu anersaaqarluni ingerlatsineq nunatsinni atuuppoq taamaattumik aningaasap nalingata assigiinnera naapertuusartariaqalerpoq.

Illoqarfinni anginerusuni, isorliunerusuni nunaqarfinnilu akissaatit nikingavallaanngillat. Ulluinnarnili atugassaanerusuni pisariaqartunilu akissaajaatit eqqarsaatigalugit isorliunerusuni nunaqarfinnilu aningaasartuuteqartarnerusut takusinnaavarput, naak aningaasap naliga nunami tamarmi assigiimmik pisissutigineqarsinnaanera isumaga malillugu assigiinniartussaagaluartoq.

Akileraartarnikkut aaqqissuuseqqittariaqarneq aningaasap pisissutigineqarsinnaanera naligiikannermik aaqqissuutissagaanni qulaajaaneq pisariaqarsorinarpoq.

Assersuutigalugumi kommuunit aaqqissuuteqqinneqarsimapput, kommuunillu ullumikkut aaqqissuunneqarsimanerat takugutsigit kommuunip ataatsip iluani innuttaasut akilertagaat assigiinngitsorujussuupput pingaartumik isorliunerusut nunaqarfiillu eqqarsaatigigaanni niuernikkut unammillerfiunngitsut ilaatigut sualuginartumik akiliuteqartarput.



Kisitsisinik pinnguartoqarsinnaagaluartoq taamaattoq ullumikkut periarfissavut tassalu akileraartarnikkut aaqqissuuseqqinnikkut annersumik nunap immikkoortuini aningaasartuuteqarnerusartut iluaqusersornissaanik siunertaqartumik sulissuteqarnissaq kinguarsaqqinneqartariaqanngitsoq isumaqarama siunnersuut manna saqqummiuppara qulaajaasoqartariaqartoq ullumikkut periarfissaareersut aqcutigalugit.

Taamatut siunnersuuteqarlunga nunatsinni siammasissumik nunaqariuseqarnerput aningaasap pisissutaasinnaanerata naligiikannersumik aaqqissuusiviginissaa piffissanngortoq isumaqarama siunnersuut manna saqqummiuppara.

Pisortanut aningaasatigut allaffissornikkullu kingunerisassat:

Siunnersuummik suliarinninneq misissuinerlu inatsisartunut agguanneqartussaavoq. Allaffissornikkut nutserinermullu aningaasartuutaassangatinneqarpoq ilinniagartuutut atorfillik AC-p ukiumik ataatsimik imalt. Ukiup aappaa avillugu sivilissusillip sinninngisaanik naleqassasoq.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Soqanngilaq